

Zastupnik Adnan Solaković na Sedmoj Radnoj sjednici Skupštine Kantona Sarajevo, održanoj dana 07.10.2015.godine, u okviru tačke Dnevnog reda, „Poslanička pitanja, inicijative i odgovori“, a u skladu sa Poslovníkom Skupštine Kantona Sarajevo postavio je zastupničko pitanje kako slijedi:

„14. Januara 2015.godine je odjeknula ekskluzivna vijest od strane MUP-a KS da su pronađeni i uhvaćeni sudionici koji su prenosili 10 kg heroína u vrijednosti od 600.000 KM prilikom čega su uhvaćeni Jašarević Seid, vozač koji je vozio iz Holandije i Šurković Mevludin koji je preuzeo ruksak u kojim su se nalazili narkotici od istoimenovanog vozača. MUP je prilikom svoje izjave rekao: „Da će se analizom utvrditi da li je to čisti ili izmiksani heroin i da li je za širu prodaju“. Prilikom toga od MUP-a KS: komesar KS, portparol KS i tadašnji ministar MUP-a su dobili 30% dodatka na platu jer ovo spada pod djelo izvanrednih rezultata rada. Međutim utvrđeno je da se nije radilo uopšte o heroínu nego o takozvanoj „heljdi“ ili sportskoj hrani proteini koje uzimaju sportisti. Postavljam pitanje da li će se vratiti novac za stimulans koji su dobili pripasnici MUP-a i ko će snositi novac za tužbe jer će ovi ljudi sigurno dobiti parnicu na sudu za navedeno. “

### **Odgovor na zastupničko pitanje:**

Dana 14.01.2015. godine, u večernjim satima, služba za odnose sa javnošću Prve policijske uprave je zaprimila anonimnu telefonsku dojavu, da će se tokom večeri na lokalitetu autobuske stanice u Sarajevu, izvršiti primopredaja opojne droge, koja je poslana autobusom iz Holandije, nepoznatom licu u Sarajevu.

Nakon zaprimanja dojave, o njenom sadržaju su, policijski službenici Prve PU, obavijestili policijske službenike Druge PU i Odjeljenja za borbu protiv zloupotreba opojnih droga Sektora kriminalističke policije Uprave policije ovog Ministarstva, koji su izvršili operativno pokrivanje lokaliteta autobuske stanice u cilju identifikacije lica koje je trebalo preuzeti poslanu opojnu drogu i u cilju pronalaska i oduzimanja opojne droge.

Dana 14.01.2015. godine, oko 22,15 sati, u ulici Trg žrtava Srebrenice bb, opština Novo Sarajevo, policijski službenici Odjeljenja za borbu protiv zloupotreba opojnih droga Sektora kriminalističke policije i Druge PU Uprave policije ovog Ministarstva, uočili su kada je jedno lice, od vozača autobusa (ova dva lica su identifikovana nakon pretresanja), preuzeo 1 (jedan) plavi ”ceker” sa nepoznatim sadržajem što se policijskim službenicima učinilo sumnjivo i moglo se dovesti u vezu sa dobijenom anonimnom dojavom.

Odmah potom je izvršen lični pretres lica Šurković Mevludin, te je tom prilikom kod njega pronađen i privremeno oduzet 1 (jedan) plavi ”ceker” sa natpisom ”PARIS” u kojem se nalaze 2 (dvije) velike crne PVC vreće i u svakoj vreći po 5 (pet) prozirnih PVC paketa sa smeđom materijom koja asocira na opojnu drogu heroin, bruto mase 10 (deset) kilograma. Navedene vreće su bile prekrivene platnenom navlakom za jorgan obojenom motivima britanske zastave.

Obzirom na zaprimljenu anonimnu dojavu, te uzimajući u obzir činjenicu da su PVC paketi sa smeđom materijom upakovani na način kako lica koja vrše zloupotrebu opojnih droga, pakuju opojne droge, da su PVC paketi upakovani u dvije crne PVC vreće i prekriveni platnom, te

uzimajući u obzir činjenicu da je materija koja je pronađena kod Šurković Mevludina svojim izgledom asocirala na opojnu drogu heroin, o svemu navedenom, u skladu sa odredbama ZKP FBiH, obaviješten je dežurni tužilac Kantonalnog tužilaštva Kantona Sarajevo, gospođa Petković Ivana, koja je usmeno naredila da se predmeti koji su pronađeni kod Šurković Mevludina privremeno oduzmu, da se Šurković Mevludin i Jašarević Seid zapisnički ispituju kao osumnjičeni, te Jašarević Seid sasluša i kao svjedok, kao i da se navedena lica liše slobode i narednog dana predaju dežurnom tužiocu Kantonalnog tužilaštva Kantona Sarajevo.

Pored naprijed navedenog, po naređenju sudije za prethodni postupak Općinskog suda u Sarajevu, gospođe Čosić Sabine, izvršen je pretres kuće i okućnice koju koristi Šurković Mevludin, kojom prilikom je privremeno oduzeta veća količina vatrenog oružja, municije, snajpera i dijelova za vatreno oružje. Za jedan dio pronađenog naoružanja Šurković Mevludin nije posjedovao odobrenje za nabavljanje i držanje.

Nakon izvršenih pretresanja i privremenog oduzimanja predmeta, policijski službenici Odjeljenja za borbu protiv zloupotreba opojnih droga, su u skladu sa odredbama ZKP FBiH, sve privremeno oduzete predmete uz izvještaje o pretresanju dostavili Općinskom sudu u Sarajevu na dalju nadležnost i postupanje, a lica Šurković Mevludin i Jašarević Seid, su uz Izvještaj o izvršenim krivičnim djelima, broj 02/2-4-KU:203/15/V.A. od 15.01.2015. godine, predati nadležnom tužiocu Kantonalnog tužilaštva Kantona Sarajevo, gospođi Hercegljija Šejli.

Policijski službenici Odjeljenja za borbu protiv zloupotreba opojnih droga su, dana 31.03.2015. godine, nakon što je nadležni tužilac Tužilaštva BiH donio naredbu za vještačenje, Centru za forenzičku i informatičku podršku MUP FBiH, aktom broj 02/2-4-04-17-5345/15, na vještačenje dostavili 1 (jedan) plavi ceker sa 10 (deset) PVC paketa sa smeđom materijom koja asocira na opojnu drogu heroin upakovani u dvije crne PVC vreće i platnenu navlaku za jorgan, a nakon što su te predmete, prethodno preuzeli iz depozita Općinskog suda u Sarajevu, gdje su do tada bili deponovani.

Takođe, policijski službenici Odjeljenja za borbu protiv zloupotreba opojnih droga Sektora kriminalističke policije Uprave policije ovog Ministarstva, nisu vršili vještačenje privremeno oduzetih predmeta, jer je Zakonom o krivičnom postupku FBiH određeno da vještačenja određuje nadležni tužilac, osim u izuzetnim slučajevima predviđenim zakonom, te da se isto vrši u forenzičkim laboratorijama.

Nakon dostavljanja predmeta koji asociraju na opojnu drogu u Centar za forenzičku i informatičku podršku MUP FBiH, do današnjeg dana nismo zaprimili nalaz vještačenja tih predmeta.

U vezi sa dijelom pitanja koji se odnosi na izvanredne rezultate rada u skladu sa Zakonom o policijskim službenicima, a na osnovu izvanrednih i objektivno ocijenjenih radnih rezultata policijskog službenika ministar na prijedlog policijskog komesara može odlučiti o jednokratnom dodatku na plaću policijskom službeniku do 30% od osnovne plaće, dok se u konkretnom slučaju dodatak nije odnosio samo na opisanu radnju.

S poštovanjem.

**MINISTAR**

Predrag Kurteš